

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

Inatsisartut aalajangiiffigisassaattut siunnersuut Naalakkersuisut peqquneqassasut inuusuttunut timersornikkut piginnaasaqarluartut eqqarsaatigalugit timersornermik ingerlatsinerup saniatigut ilinniakkamik ingerlatsisinnaanissaat eqqarsaatigalugu timersornermut Højskolemik pilersitsisinnaanermut periarfissanik misissueqqullugit.

(Inatsisartunut ilaasortat Siverth K. Heilmann aamma Steen Lyngge, Atassut)

Pillugu

ISUMALIUTISSIISSUTAA

Siunnersuutip aappassaanneerpeqarnerani tunniunneqartoq

Kultureqarnermut Ilinniartitaanermut Ilisimatusarnermut Ilageeqarnermullu Ataatsimiititaliap suliaqarnermini makkuninnga inuttaqarpoq:

Inatsisartunut ilaasortaq Steen Lyngge, Atassut, siulittaasoq

Inatsisartunut ilaasortaq Vivian Motzfeldt, Siumut, siulittaasup tullia

Inatsisartunut ilaasortaq Randi V. Evaldsen, Demokraatit

Inatsisartunut ilaasortaq Peter Olsen, Inuit Ataqatigiit

Inatsisartunut ilaasortaq Mimi Karlsen, Inuit Ataqatigiit

UPA2015-mi siunnersuutip ulloq 25.marts 2015 siullermeerlugu suliarineqarnerata kingorna ataatsimiititaliamit suliarineqarpoq.

1. Siunnersuutip imarisai siunertaalu

Siunnersuutikkut matumuunakkut siunnersuuteqartut kissaatigaat naalakkersuisut Timersornermut Højskolimik pilersitsinissamut periarfissanik misissueqqullugit inatsisartunit

peqquneqarnissaat. Siunnersuutikkut matumuunakkut siunnersuuteqartut kissaatigaat Naalackersuisut inatsisartunit Højskolimik pilersitsinissamut periarfissamik misissuinissamik peqquneqarnissaat. Højskoli taanna inuusuttunut piginnaasaqarluartunut ilinniagaqarnissamut piareersarnermik sananiatigut timersornermik ingerlatsiniartunut naleqqussarneqarsimassaaq. Ilanngullugu siunnersuutip siullermeerneqarnerani siunnersuuteqartut erseqqissarpaat inuusuttunut unittoornissamut ulorianartorsiortunut ingerlaannarnissamut iluaqutaasumik højskolimik pilersitsisoqarnissaa siunnersuummi siunertarineqarmat.

2. Siunnersuutip Inatsisartuni siullermeerneqarnera

Nunatsinni Timersornerup ineriartortuarnissaata pingaaruteqassusia tunngavigalugu Atassutip aamma Inuit Ataqtigiit siunnersuut ilalerpaat. Tamatuma saniatigut partiit taakku marluk isumaqarput timersornermik højskoli inuusuttunut suli ilinniaqqinnissamut aalajangersimanningsunut annertuumik pingaaruteqassasoq.

Parti Naleqqamit taamatutaaq oqaatigineqarpoq højskolinut pioreersunut timersornermut tunngasunik ilinniagassamik ilanngussisoqarnissamik periarfissaqartariaqartoq. Taamaalillugu siunnersuut ataatsimiititaliamut suliassanngorlugu ingerlatinneqarpoq kaammattuutigalugu periarfissap taassuma eqqarsaatigineqarnissaa.

Naalackersuisut akissuteqaataanni tunngavilersuutigineqarsimasut innersuullugit siunnersuut Siumumit Demokratinillu itigartinneqarpoq. Tassani aamma oqaatigineqarpoq misissuinissamik siunnersuut unitsinneqarallartariaqartoq GUX-mi timersornermik ilinniartitsinerup maanna suliniutigineqartut misilittagaqareerfigineqarnissaata tungaanut. .

Siunnersuut Kultureqarnermut, Ilinniartitaanermut, Ilisimatusarnermut, Ilageeqarnermullu ataatsimiititaliamut suliassanngorlugu partiit tamarmik ingerlateqqippaat.

3. Siunnersuutip ataatsimiititaliamit suliarineqarnera.

3.1. Siunnersuutip nassatarisassai

Siunnersuutip matuma suliarinerani ataatsimiititaliamit malugineqarpoq siunnersuutip taasissutissartaani danskisut kalaallisullu allassimanerini oqaatitsisut assigiinngissuteqartoqartoq. Siunnersuutip taasissutissartaani taamaalillugu imatut paasineqarsinnaavoq; inuusuttut pikkorissartut timersornermut højskolimi periarfissami ilinniagaqalernissamut piareersarnermut atatillugu pikkorissartut. Taanna imatut paasineqarluni, pikkorissartut ilinniagaqalernissamut pikkorissarnerinik. Peqatigisaanillu siunnersuutip taasissutissartaani imatut paasineqarsinnaalluni; inuusuttut iliniarnermut

atatillugu pikkorissarnerunik, tassungalu atatillugu siunissami ilinniagarisassaminnut piareersarlutik.

Siunnersuummi timersornermut højskolimik pilersitsisoqarnissaanik inuusuttut suli ilinnialersimangitsut imaluunniit ilinniagaqalernissamut piareersarnissamut, soorlu ilinniagaqalernissamut piareersaatitut ilinniarnertuunngorniarfinni aallartissimasut timersornermut piginnaasallit tiguneqarfigisinnaasaannik misissuinissaq siunertarinqartoq ataatsimiititaliamit paasineqarpoq.

Siunnersuutip matuma danskisoortaani takuneqarsinnaavoq timersornermut højskoli pineqartoq inuusuttunut piginnaasalinnut ilinniagaqalernissamut piareersarnermik saniatigut timersornermik ingerlatserusuttunut naleqqussarsimassasoq. Inuusuttunut piginnaasalinnut “atuagarsornermik ilinnialernissamut piareersartunut” tassa ilinniarnertuunngorniarfinnut assigusuni ingerlatsisut pineqanngitsut ataatsimiititaliaq isumaqarpoq. Paarlattuanik pineqarput inuusuttut højskolimi ilinniarnermi nalaani siunissamut sutut ilinniagaqalernissamut eqqarsaatersortut. Tassa timersornermut højskolimi ilinniarneq ilinniagaqarnermut atatillugu ingerlanneqassaaq.

Siunnersuummi siunertarinqartumut sapinngisamik isumaqatigiittoqarnissaa anguniarlugu, matumuuna ataatsimiititaliaq isumaliutissiissukkut matumuunakkut allannguutissatut siunnersuuteqassaaq.

3.2. Folkehøjskolit

Siunnersuummi taasissutissami matumani innersuussutigineqarpoq “timersornermut højskoli”. Oqaatsip folkehøjskoli atorneqarnera inatsisini atuuttoq tassani pineqartoq aammalu Kalaallit Nunaanni Højskolit malittarigaat ataatsimiititaliamit paasineqarpoq

§ 1. Folkehøjskolit ilinniartitsineramik nalinginnaasumik peroriartuutaasumik, ilinniartunut neqerooruteqartarput, pingaartitatut nammineq toqqagaq aallaavigalugu tamatigoortumik, nalinginnaasumik demokratiskiusumillu inunnik qaammarsaanissaq siunertaralugu. Folkehøjskolit nalinginnaasumik peroriartuutaasumik atuartitsinerup iluani atuartitsissutit ataasiakkaat imaluunniit atuartitsissutit ataatsimoortut salliutissinnaavaat.

§ 8. Folkehøjskolit suliffeqarfittut imminnut pigisutut ingerlanneqarput, qullersaaffigalugillu aqunneqarnerat siulersuisunit 5-7-inik ilaasortaqaartunik

isumagineqarluni, taakku ilinniarfiup ingerlannera qullersaaffigalugu akisussaaffigaat, tamatumunnga ilanngullugit suliamut aningaasaqarnermullu tunngasutigut ingerlassat aamma ilinniarfiup ingerlassai pillugit aalajangersakkat maleruarneqarnissaat. Siulersuisut aningaasartuutissatut isertitassatullu missingersuutit akuersissutigisarpaat, tamatumunnga ilanngullugit forständerip inassuteqareerneratigut aningaasaqarnikkut sillimmatit agguaannerat taakkualu atorneqarnissaannut tunngavissat. Siulersuisut naatsorsuutit atsiussavaat.

Inatsisit atuuttut malillugit højskolimi ilinniarneq tassaavoq pikkorissartunut ataasiakkaanut folkehøjskolimi ilisimasat qaffassarnissaannut periarfissaq. Taamaalilluni nalinginnaasumik paasinnittaaseq malillugu ilinniarnertut isigineqarsinnaanngilaq. Pikkorissartut højskolimik aallartitsisut tunngavissatut aalajangersimasaannik folkehøjskolimi naleqartitanik tunngaveqartumik ilinniarnissamat neqeroorfigineqassapput. Akuttunngitsumik aallartitsisut takku inuit ataasiakkaajusarput soqutigisaqaqatigiilluunniit naleqartitanik ileqqunilluunniit ingerlatitseqqinnissamik anguniagaqartut.

3.3 Misissuinerup annertussusaa imarisaalu

Ataatsimiititaliap paasinninnera imaappoq; Inatsisit atuuttut tunngavigalugit siunnersuummi misissorneqartussatut kissaatigineqartut tassaassut aningaasatigut kingunissartinneqarsinnaasut, sipaarutaasinnaasunik nalilersuinerit, aammalu soqutigisaqaqatigiinnik taamatut timersornermut højskolimik pilersitsinissamat soqutigisaqartunik peqarnersoq misissorneqassasoq.

Kalaallit Nunaanni højskolit pioreersut allilerneqarsinnaanerisa eqqarsaatigineqarsinnaanerisa misissuinermi ilanngunneqarsinnaanerat ataatsimiititaliamit kaammattuutigineqarpoq. Taamatut kissaateqarnermut tunngaviuvoq højskolit pioreersut imaluunniit timersornermut højskoli pilersinneqassappat, pitsaassusaanut apparsaataanngitsumik sapinngisamik annikinnerpaamik missingersuusiortoqarnissaa.

Misissuinerup saqqummiunneqarnerani makkuninnga assersuunneqarsinnaasunik ilaasoqartariaqartoq ataatsimiititaliaq isumaqarpoq.:

- ilinniagaqartunik kalaallinik Danmarkimi/nunani allani timersornermut højskolinut atuariartortitsinermi aningaasartuutaasimasut ullumikkullu aningaasartuutaasartut.

- Timersornermut Højskolimik sanaartornermi aningaasartuutit kiisalu tamatumunnga ingerlatsinermut aningaasartuutit.
- Timersornermut højskolit pioreersut allilerneqarnerani aningaasartuutit kiisalu periarfissaqarpat ingerlatsinermut aningaasartuutit.
- Ilinniartut Danmarkimut timersornermut højkolinut atuariatortinneqartarnerinut assersuutigalugu kalaallit nunaanni timersornermut højskolimik pinersitsinermi inuiaqatigiinnut aningaasartuutaasussat imaluunniit sipaarutaasussat.
- Timersornermut højskolini ilinniartarnerup pilerigineqartarneranik naliliineq kiisalu ukiumut ilinnartumut aningaasartuutissatut missingiussat.

Naalackersuisut misissuinermi aamma ilanngussinnaavaat qanoq ilillugu højskolimi pikkorissarnerit akuerineqarsinnaasumik pitsaassusillit qulakkeerneqarsinnaanersut. Taamaalillugu Naalackersuisut misissuinermi timersornerup iluani højskolini pikkorissarnerni ilinniartitsisussanik piffinnik ilisimasaqartunik atorfissaqartitsinnaaneq misissorsinnaallugu.

Siunnersuut una akuerineqassagaluarpat Naalackersuisut højskolit pioreersut, soqutigisaqatigiit assigisaallu timersornermut højskolimik pilersitsinissamut periarfissanik misissuinermi ilaatissagaat naggataatigut ataatsimiititaliamit kaammattuutigineqarpoq. Misissuisoqassappat Naalackersuisut sulianiutitut ingerlasut tamaasa, kommunimiippata imaluunniit namminersortuni il.il. ilanngullugit misissussagaat ataatsimiititaliamit pissusissamisoortutut isigineqarpoq.

4. Siunnersuutip aningaasatigut kingunissai

Inatsisartut suleriusaanni § 33 imm. 1-mi allassimavoq aalajangiussassatut siunnertuutip piviusunngortinnissaanut kingunissaritinneqartut siunnersuutip tunngavilersuutaanut ilanngunneqarsimassasut.

Siunnersuutip piviusunngortinneqarnerani aningaasatigut kingunissaritinneqartut AC-tut atorfilimmut ukiup affaata ukiullu ataatsip akornanni sulinermik naleqassasooq naatsorsuutigineqarpoq ataatsimiititaliamit maluginiarneqarpoq. Aningaasanngorlugu 250.000 kr.-niit 500.000 kr. naleqassangatinneqarluni.

5. Ataatsimiititaliap innersuussinera

Ataatsimiititaliami **amerlanerussuteqartut** Atassut, Siumut aamma Inuit Ataqaatigiit siuliani saqummiunneqartut tunngavigalugit matumuuna allannguutissatut siunnersuuteqarput.

“Inuusuttunut piginnaasalinnut siunissami ilinniagaqalernissamut piareersarnerminnut peqatigitillugu timersornermik ingerlataqarusuttunut naleqqussagaasumik timersornermut højskolimik pilersitsinissamut periarfissanik misissuinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Ataatsimiititaliami **amerlanerussuteqartut** Atassut, Siumut aamma Inuit Ataqaatigiit matumuuna allannguutissatut siunnersuut akuerisassanngorlugu innersuussutigaat.

Ataatsimiititaliami **ikinnerussuteqartut** Demokratineersut siunnersuummut imatut oqaaseqaateqassapput:

Inuusuttut timersornermut immikkut piginnaasallit unammilligassat eqqortut qinerniarlugit imaluunniit piginnaasaleqatiminnut unammillernissaq anguniarlugu nunani allani timersornermut højskolernissartik qinissagaat ilimananarluinnarpoq, imaassinnaavoq Danmarkimi imaluunniit Norgemi. Taamaattumik inuusuttunut piginnaasalinnut nunatsinni timersornermut højskole pisariaqartinneqanngilaq. Tamatuma saniatigut demokratit isumaqarput inuusuttut timersornermut piginnaasallit Nuummi GUX timersornermut ingerlatsinermik immikkoortulik atorsinnaagaat. Piffissami matumani nunatta aningaasatigut inissisimamut eqqarsaatigalugu pingaaruteqarpoq aningasartuutissat tamarmik eqqarsaatigilluaqqaartarnissaat. Siunnersuutip matuma pissarsiaqaataanissaa qularnartup inuiaqatigiit minnerpaamik 250.000 kr.-nik aningaasartuuteqartissussaavai.

Ataatsimiititaliami **ikinnerussuteqartut** Demokraatit allannguutissatut siunnersuut taamatuttaarlu aalajangiiffigisassatut siunnersuut itigartinneqassasut innersuussutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Steen Lynge, Siulittaasoq

Vivian Motzfeldt

Randi V. Evaldsen

Peter Olsen

Mimi Karlsen